

**JAMHURI YA MUUNGANO WA TANZANIA**

**BUNGE LA TANZANIA**



**ORODHA YA SHUGHULI ZA LEO**

**MKUTANO WA SABA**

**KIKAO CHA HAMSINI NA SABA**

**30 JUNI, 2017**



# ORODHA YA SHUGHULI ZA LEO

## MKUTANO WA SABA

KIKAO CHA HAMSINI NA SABA – TAREHE 30 JUNI, 2017

I. DUA:

II. MASWALI:

OFISI YA RAIS (TAMISEMI):

468. MHESHIMIWA STANSLAUS HAROON  
NYONGO (MASWA MASHARIKI):

Atamuuliza Mheshimiwa Waziri wa Nchi, Ofisi ya Rais (TAMISEMI):- Walimu Wilayani Maswa wana uhaba wa nyumba za kuishi; pamoja na juhudi za Wananchi kujenga nyumba za Walimu wa Shule za Msingi na Sekondari lakini Walimu hao bado wanahitaji kujenga nyumba zao wenyewe za kudumu:-

Je, ni lini Serikali itaweka utaratibu maalum wa kutoa mikopo kwa Walimu hao ili wajenge nyumba zao binafsi.

**469. MHESHIMIWA ROSE KAMILI SUKUM  
(VITI MAALUM):**

Atamuuliza Mheshimiwa Waziri wa Nchi, Ofisi ya Rais (TAMISEMI):- Serikali ina utaratibu wa kutoa fedha kwa ajili ya Shule za Bweni nchini. Kwa kipindi cha kuanzia tarehe 31/08/2013 hadi 10/2/2014 Halmashauri ya Hanang' ilipokea kutoka Serikali Kuu kiasi cha Tsh.508,779,500/= kwa ajili ya chakula cha Shule za Bweni. Taarifa zinaonesha kuwa fedha zilizotumika kununua chakula ni Tsh.225,585,000/= kwa takwimu hizo bakaa ni Tsh.283,194,500/= na kwa mujibu wa Mkaguzi, bakaa hiyo haionekani kwenye akaunti yoyote ya Benki:-

- (a) Je, fedha hizo zinarudishwa Hazina bila ya uwepo wa nyaraka zozote toka Halmashauri kuonesha muamala unavyofanya kazi;
- (b) Je, kama fedha hizo hazikurudishwa Hazina, nani anaweza kuidhinisha matumizi bila ya mpango wake kupitishwa na Kamati ya Fedha na Mipango ya Halmashauri;
- (c) Je, kama fedha zimetumika bila kupangiwa na Kamati halali, ni kwa nini wahusika bado wanaendelea kuwa Ofisini bila ya kufunguliwa mashtaka ya wizi wa kuaminika.

**WIZARA YA HABARI, UTAMADUNI, SANAA NA MICHEZO:**

**470. MHESHIMIWA COSATO DAVID CHUMI (MAFINGA MJINI):**

Atamuuliza Mheshimiwa Waziri wa Habari, Utamaduni, Sanaa na Michezo:- Wanariadha wa baadhi ya nchi ambazo kijiografia mazingira yao yanafanana na baadhi ya maeneo katika nchi yetu wamekuwa wakishiriki katika mashindano ya riadha ya Majiji makubwa duniani kama vile New York Marathon, Tokyo Marathon n.k. na hivyo kuzitangaza nchi zao ipasavyo:-

Je, Serikali imejipanga vipi kuhakikisha kuwa inafufua mchezo wa riadha ili kutumia kutangaza utalii wa nchi yetu.



**WIZARA YA VIWANDA, BIASHARA NA UWEKEZAJI:**

**471. MHESHIMIWA SHALLY JOSEPHA RAYMOND (VITI MAALUM):**

Atamuuliza Mheshimiwa Waziri wa Viwanda, Biashara na Uwekezaji:- Kuna ongezeko la bidhaa bandia na zisizo na viwango zinazoingizwa nchini; miongoni mwa bidhaa hizo ni pembejeo za kilimo, dawa za mifugo, dawa za binadamu, vyakula, vinywaji, vifaa vya nyumbani nk:-

(a) Je, ni hasara kiasi gani imepatikana kwa mwaka mmoja uliopita kutokana na bidhaa hizo kuingizwa nchini na kutumiwa na Wananchi;

(b) Je, ni hatua gani zinachukuliwa kukomesha bidhaa hizo kuingia nchini hasa maeneo ya Vijijini ambako uelewa wa watumiaji ni mdogo na Maafisa Wadhibiti ni wachache.

**WIZARA YA UJENZI, UCHUKUZI NA MAWASILIANO:**

**472. MHESHIMIWA MUSSA BAKARI MBAROUK  
(TANGA MJINI):**

Atamuuliza Mheshimiwa Waziri wa Ujenzi, Uchukuzi na Mawasiliano:- Kwa kuwa vyombo vya usafiri majini havifanyi vipimo vya watu na mizigo:-

Je, kwa nini Serikali isianzishie utaratibu wa kupima mizigo na usajili wa abiria katika vyombo vyote kama wanavyofanya “*Air Port*” ili kuepusha ajali za mara kwa mara.

**473. MHESHIMIWA SEIF KHAMIS GULAMALI  
(MANONGA):**

Atamuuliza Mheshimiwa Waziri wa Ujenzi, Uchukuzi na Mawasiliano:- Tanzania tuna ushindani mkubwa wa Kampuni za Simu na katika Jimbo la Manonga maeneo kama ya Kata ya Mwashiku, Ngulu, Ntobo, Kitangiri, Sungwizi, Mwamala, Uswaya, Tambarale na Igoweko hayana Minara ya Mawasiliano:-

Je, ni lini Serikali itazielekeza Kampuni za Simu kusimika minara yao kwenye maeneo ambayo hayana mtandao hata mmoja wa Mawasiliano.

**WIZARA YA ARDHI, NYUMBA NA MAENDELEO YA  
MAKAZI:**

**474. MHESHIMIWA DANIEL EDWARD MTUKA  
(MANYONI MASHARIKI):**

Atamuuliza Mheshimiwa Waziri wa Ardhi, Nyumba na Maendeleo ya Makazi:- Taarifa ya Idara ya Upimaji na Ramani ya Wizara ya Ardhi, Nyumba na Maendeleo ya Makazi inalitaja eneo la Chisinjisa lililopo Wilaya ya Manyoni kuwa ndipo alama pekee ya katikati (*Centre Point*) ya Tanzania inapatikana:-

(a) Je, ni lini Serikali italitambua rasmi eneo hili na kulitangaza katika Gazeti la Serikali;

(b) Je, Serikali haioni umuhimu wa kuliendeleza na kulitangaza eneo hilo ili kuvutia utalii wa ndani na nje kama chanzo cha mapato.

**475. MHESHIMIWA DKT. MARY MACHUCHE MWANJELWA (VITI MAALUM):**

Atamuuliza Mheshimiwa Waziri wa Ardhi, Nyumba na Maendeleo ya Makazi:-

Je, nini Sera ya Serikali katika kubadilisha mandhari ya maeneo ambayo ni *squatters* au ya wazi kwa kuwekeza katika majengo ili kuwa na makazi ya kisasa kwa ajili ya Wananchi kwa kutumia ardhi iliyopo katika eneo husika.

**WIZARA YA MAMBO YA NDANI YA NCHI:**

**476. MHESHIMIWA FRANK GEORGE MWAKAJOKA (TUNDUMA):**

Atamuuliza Mheshimiwa Waziri wa Mambo ya Ndani ya Nchi:-

Je, Serikali inatoa kauli gani kuhusiana na ada ya zimamoto ambayo wanatozwa wafanyabiashara katika Halmashauri ya Mji wa Tunduma huku kukiwa hakuna Jeshi la Zimamoto katika eneo hilo.

**477. MHESHIMIWA MWANTAKAJE HAJI JUMA (BUBUBU):**

Atamuuliza Mheshimiwa Waziri wa Mambo ya Ndani ya Nchi:-

- (a) Je, ni lini Serikali itakipatia gari jingine Kituo cha Polisi Magharibi "A" ili kupunguza matumizi ya magari binafsi kwa Jeshi la Polisi;
- (b) Je, Serikali imejipanga vipi kupunguza uhalifu unaojitokeza mara kwa mara.

**DODOMA  
30 JUNI, 2017**

**DKT. T. D. KASHILILAH  
KATIBU WA BUNGE**